

AURKEZPENA**Adierazpen askatasuna defendatzeko plataforma eratu da Nafarroan**

Irene Arrizurieta | IRUÑEA

Adierazpen Askatasuna-ren aldeko Nafarroako Plataforma aurkeztu zuten atzo, Iruñeko Foruen Monumentuen aitzinean. Jokin Larre Plataformako kide eta abokatuak Foru Erkidegoan «herritar batzuen askatasuna eta adierazpen eskubideak gero eta mugatuagoak daudela salatu zuen.

«Plataforma hau beharrezkoa dela uste dugu, adierazpen askatasuna mugatu gabeko kontzeptu juridikoa delako. Talde batzuentzako aipatutako kontzeptu juridikoa murriztu egiten da, eta beste batzuentzako, berriz, gero eta gehiago luzatzen da, ustez delitu nabariak egin arren», ohartarazi zuen.

Plataformak azaldu zuenez, «1992tik 2000ra Nafarroan 500 laguni baino gehiagori isuna ezarri zaie, adierazpen askatasuna erabiltzeagatik. Horrek ekarri du 155 milioi pezeta baino gehiagoko diru isunak jaso izana».

Plataformak Nafarroako eragile sozial, sindikatu, erakunde eta alderdi politikoekin bilerak egiteko asmoa du.

LAPURRETA. ETaren izenean telefono deia jaso zuten gero DYAn**Trokelatzeko makina bat eta 300 bat matrikula lapurtu dituzte Arrasaten**

Udalauto enpresako langile bati eskuak lotu eta pabilioi barruan itxi zuten bi lagun armatuk, eta ostutako furgonetan ihes egin

Erredakzioa | DONOSTIA

Burua estalita zeramaten bi pertsona armatuk trokelatzeko makina bat eta zenbakirik gabeko 300 bat matrikula lapurtu zituzten atzo Arrasaten. ETaren izenean telefono deia jaso zuten handik hiru ordura DYAn, lapurreta bere gain hartu eta pertsona bat enpresa barruan itxita utzi zutela jakinarazteko.

Lapurreta eguerdiko 12:30 aldera gertatu zen, Arrasateko Udalauto enpresan. Burua estalita zeramaten bi lagun armatuk lantegian zegoen behargin bakkarrari eskuak lotu, eta pabilioi barruan itxi zuten. Trokelatzeko makina bat eta zenbakirik gabeko 300 bat matrikula hartu, eta enpresan bertan ostutako Seat Inca furgoneta batean eraman zituzten.

Lapurreta gertatu eta hiru ordu ingurura, ETaren izenean mintzatu zen pertsona batek telefono deia egin zuen DYAn, eta langile bat Arrasateko industrialdean eskuak lotuta utzi zutela adierazi.



JUAN HERRERO / EFE

Lapurretan egin zuten enpresa dagoen pabilioia, Legarre auzoan.

Udalautoko langileak bere ezagun bati telefonoz deitzea lortu zuen, eta askatzen lagundu zion. Pertsona horrek deitu zion Ertzaintzari, lapurretaren berri emateko.

Ertzaintzak Arrasateko industrialdean ostutako furgoneta handik gutxira aurkitu zuen, Arrasaten bertan, Zaldipe kalean. Ibilgailua ikuskatu zuten Ertzaintzako kideek, zakur trebatuekin, eta lehergai-lurik ez zegoela egiaztatu

zuten, Herrizaingo Sailak jakinarazi duenez.

Lapurretaren berri izan ostean, Ertzaintzako zenbait unitate Legarre auzoko Gipuzkoa etorbidera joan ziren —han dago lapurreta gertatu zen enpresa—, eta Auto-Egido dagoen pabilioiko inguruak itxi zituzten.

Arratseko 20:15ak igarota, Ertzaintzak oraindik enpresan jarraitzen zuen, eta, inguruak itxita, lapurretaren inguruko ikerketak egiten ari zen.

EH-REN MANIFESTAZIOA. Espainiako Poliziaren 50 furgonak jarraitu zioten 1.500 lagun manifestazioari**EHk burujabetza aldarrikatu du Iruñean, segurtasun neurri zorrotzez inguraturik**

Irene Arrizurieta | IRUÑEA

EHk *Burujabetza da bakea* lelopean Iruñean atzo deitu elkarretaratzean 1.500 lagun inguru bildu zen. Autobus geltokitik atera zen manifestazioa. Buruan EHko Nafarroako kide ugari zihoazen, *Burujabetza da bakea* leloa idatzia zuen parkarta zeramatela, eta jarraian ikurrinak, Nafarroako banderak eta faxismoaren aurkako ikurrak zeramatzaten manifestariak abiatu ziren. Atzean zein alde bietan Espainiako Polizia izan zuten orpoz orpo. 50 furgonak jarraitu zioten manifestazioari, eta elkarretaratuen argazkiak atera zituzten.

Espainiako Ordezkaritzaren Iruñeko egoitza iragan ondo-

ren, Gaztelu Plazara iritsi ziren. Fernando Barrena EHko Nafarroako legebiltzarkideak duela bi aste debekatu elkarretaratzea «faxismoaren adibide garbia» dela salatu zuen. Ildo horretan, taldearen deialdi publikoak «berreziki UPN eta PPri egiten dietela min», parlamentarioak azpimarratu zuenez.

Bestalde, Ibarretxeren azken egunotako «jokaera» salatu zuen, «ez dagokion euskal herritar guztien ordezkapena bere egiten duelako». «Ez da inor Euskal Herriarentzat den zerbait ordezkatzeko, ez dituelako Nafarroako eta Iparraldeko biztanleak ordezkatzeko», esan zuen. Alderdi politikoek ika-mikak baztertu, eta «herritarren eskaera gatazkari irtenbideak



MIKEL SAIZ

Polizia Nazionalaren kontrola etengabea izan zen manifestazioan.

aurkitzea» dela ohartarazi zuen. Beraz, aukeratu behararen premiaz mintzatu zen Barrena. «edo Madril eta Parisek inposatzen duen zatiketari amen esaten diogu, edo gure herriaren subiranotasua berreskuratzen

dugu, euskal herritarrek Euskal Herriaz erabakitzeko».

Barrenaren iritziz, Donostian hilaren 24an egingen den Udalbiltzaren batzar nagusia «subiranotasunaren aldeko apustu garbia» izanen da.

EAJ**Mobilizazio etengaberako deia egin du EAJk egoera politikoa desblokeatzeko**

Iñaki Uriarte | BILBO

EAJk gizarte mobilizazio etengabea bultzatu nahi du egungo «blokeo egoera apurtu eta jokabide in-mobilistak desagerrarazteko».

Joseba Egibarrek, Juan Jose Ibarretxek proposatutakoan oinarriturik, berretsi zuen giza eskubideak, elkarriketa eta euskal herritarren erabakigunea direla oinarri, gatazka politikoari irtenbidea emateko. «Gizarteko gehiengoak osatu behar du, uholde baten moduan, hiru oinarri horien inguruan benetakoa dinamika bat; hiru oinarriekin ezintasunak dituenak printzipio horietara iristeko».

Prozesu politiko berri bat irekitzeko, alderdi politikoaren dinamikatik urrunago joan beharko dela ohartarazi zuen. «Gizarteko gehiengoak hala pentsatzen badu, oinarri horien inguruan bere estrategia jorratzen saiatu beharko genuke herrigintzan edo politikan ardura dugunok», adierazi zuen. Egibarrek ekimen hori EAEko hauteskunde aurrerapenetik bereizi nahi izan zuen.

«Muturreko poloak» mugiarazi nahi ditu

Ibarretxek eta EBBk plazaratutako ildotik kanpo jarri zituen ezker abertzalea eta PP-PSOE, «muturreko poloak». Egibarren ustez, «EHko munduak giza eskubideen zutabea ez du garrantzitsutzat jotzen». PP eta PSOEren arazoa, elkarriketa eta euskal herritarrek libre eta demokratikoki erabakitzen dutena errespetatzeko orduan datorke.

Elkarriketa, normalizazioa lortzeko «ezinbesteko tresna» dela esan zuen. PPK eta PSOEek horri uko egiten diote, «bakea ez dutelako nahi».

Herritarren erabakieki-ko errespetua ere eskatu zuen Egibarrek. «Guztiok onartu behar dugu euskal gizarteak nortasun politikoa baduela bere etorkizuna erabakitzeko, eta horren bidetik euskal gizarteari kontsulta bideak eskaini behar dizkiogula».